


CHINESE-JAPANESE LIBRARY OF
HARVARD-YENCHING INSTITUTE
AT HARVARD UNIVERSITY
APR 21 1941

T5781/2180.1(1)



康熙六十年新鐫

狀元策

殿試策

哈佛大學漢和
圖書館珍藏印

國家等工。由來尚矣。自治安
之策。傳於洛陽。天人之對著
於江都。迄晉唐宋元明以來。
代有偉人。文多作家。而事業
功烈。稱是者。傳焉。是人以策
傳。策以也。我

朝盛治光昭

聖主作人名

蔚然先

後輝映炳如皇可頌可記

何能勝筆。但文之尤者。

諸永久。而彰之來世。則

之寄。洵不容已。俾

而後有所資。然是一

彰其文。亦以表其行。原

朝廷策士之意。必求得其人。釋褐

一朝。榮光三族。位備卿

秉忠真。奠社稷。福蒼生。功名

蓋天下。事業傳奕禩。而後文

與行稱。其實齊。匪曰一筆

墨。亦盛也。誠建

廷試者後即踐為實事。豈徒副名士之望。抑亦為國家之光。康熙六十年冬月長至日。江右繡谷張于臯鳳鳴氏書於京都榮錦堂書肆。



大學士伯張 等為欽奉

乾隆四年議定

上諭事該臣等會議得

殿試乃國家求才之鉅典而士人進身入仕之始也近歲以來所對策文拘定時格未能指畫精詳援據該洽爭飾駢語以為頌聯讜說雷同實屬無益仰蒙

皇上特降諭旨今年

殿試戒諸貢士刪去頌聯之舊習並飭臣等斟酌策文定式誠求才勵士之至意臣等謹按漢文帝十五年始詔舉賢良對策者百餘人武帝元光五年詔舉對策者亦百人皆天子道其所欲問而親策之於是晁錯董仲舒之徒出焉唐

制凡天子自詔曰制舉所以待非常之才天授元年策問貢士於洛陽殿殿試之名由此始後周顯德四年詔州郡舉人送吏部量試策論三道限三千字宋世仍之真宗咸平中田錫上疏言兩漢取人不限對策字數其所對盡其所見故孝文時晁錯對策二千字董仲舒二千餘字及再三策之所對或千餘字或二千餘字漢得賢良斯爲盛矣慶歷元年富弼上言明經選試尤爲良法令不較字數專以經中否爲格夫設策問之而猶限以字數自非所以盡謹言收積學也我

朝取士遠邁往昔三歲

臨軒策問未嘗限之以有數之字與一定之法冀得竒俊傑出之才而拔之然士子相循積久成俗於字之多少若有定數寫之起訖若有定位至於策中頌聯現蒙

皇上飭禁多士自當凜遵若夫酌定規模應取歷朝流傳誦習之文以爲成式如漢則晁錯董仲舒唐則劉蕡宋則蘇軾雖則短長不同皆要條對明切古茂博暢平時誦之既可

以益士人之學問而對策倣之復有以佐大廷之敷陳應請通飭各省學臣廣行曉諭俾士子知悉務期貫穿古今陶鑄經史服習旣久規矩在心承問置對時必有斐然可觀者矣再

殿試試卷舊無橫格嗣後貢士等果有通達治體學問淹通者應聽其發揮不必限以字數惟最短者亦必以千爲率不及一千字者不入式論至於四六頌聯並不切膚泛套語槩不准復用其前幅策冒十四行後幅空白十四行原非古式不必拘泥惟承問逐條詳對起處仍書臣對臣聞字樣訖處仍書臣草茅新進云云字樣以昭畫一奉

旨依議

每科會試年出榜後

禮部具題請

旨五月初六日早諸貢士赴

太和殿前

殿試

皇上賜策問

五月初十日早

讀卷等官并諸王以下公以上文武百官各具朝服赴

太和殿前侍立禮部官捧

黃榜置於

丹陛正中黃案上、鴻臚寺官傳

制唱名、

禮部官捧

黃榜置於

龍亭內、鼓樂前導、出

長安左門外張掛、順天府官用傘蓋儀從、送狀元

歸第、

五月十二日、

賜宴於禮部、

五月十五日、

賜狀元頂帽披領帶等物、及進士折鈔銀兩、

五月十六日、狀元率諸進士上

表謝

恩、

五月十八日、狀元率諸進士詣

先師孔子廟行禮、

康熙甲辰科

狀元嚴我斯

榜眼李元振

探花秦弘

康熙丁未科

狀元繆彤

榜眼張玉裁

探花董訥

浙江湖州府歸安縣民籍 鄉試第九十

一名 會試第二百八十六名

河南歸德府柘城縣民籍 鄉試第四十

六名 會試第一百三十九名

江南常州府無錫縣民籍 鄉試第九名

會試第一百七名

江南蘇州府吳縣民籍 鄉試第四十四

名 會試第三十六名

哈佛大學漢和圖書館珍藏印

江南鎮江府丹徒縣民籍 鄉試第十五

名 會試第二十九名

山東濟南府平原縣民籍 鄉試第十七

名 會試第一百三十五名

康熙庚戌科

狀元蔡啓傅

榜眼孫在豐

探花徐乾學

康熙癸丑科

狀元韓 菼

榜眼王鴻緒

探花徐秉義

浙江湖州府德清縣民籍附學生 鄉試第一百十一名 會試第二百零五名

浙江湖州府德清縣民籍附學生 鄉試第二十三名 會試第一百六十八名

江南蘇州府長洲縣民籍拔貢生 順天鄉試第三十名 會試第五十二名

江南蘇州府長洲縣民籍監生 順天鄉試第十六名 會試第一名

江南松江府婁縣民籍監生 順天鄉試第三十七名 會試第四名

江南蘇州府崑山縣民籍監生 順天鄉試第四十五名 會試第二名

康熙丙辰科

狀元彭定求

榜眼胡會恩

探花翁叔元

康熙己未科

狀元歸允肅

榜眼孫 卓

探花茆薦馨

江南蘇州府長洲縣民籍 鄉試第二十二名 會試第二十三名

浙江湖州府德清縣民籍 鄉試第四十三名 會試第五十五名

直隸永平府永平衛民籍 鄉試第二十四名 會試第六名

江南蘇州府常熟縣民籍 鄉試第二十四名 會試第四十六名

江南寧國府宣城縣民籍 鄉試第十六名 會試第六十一名

浙江湖州府長興縣民籍 鄉試第三十三名 會試第二十三名

浙江湖州府長興縣民籍 鄉試第三十三名 會試第二十三名

康熙壬戌科

狀元蔡升元

榜眼吳涵

探花彭寧求

康熙乙丑科

狀元陸肯堂

榜眼陳元龍

探花黃夢麟

浙江湖州府德清縣民籍 鄉試第五十二名 會試第一百六十三名

浙江嘉興府石門縣民籍 鄉試第十五名 會試第四十八名

江南蘇州府長洲縣民籍 鄉試第十二名 會試第一百三十九名

江南蕪州府長洲縣民籍歲貢生 鄉試第五名 會試第一名

浙江杭州府海寧縣民籍副榜貢生 鄉試第四十三名 欽定會試第二名

江南江寧府溧陽縣民籍廩生 鄉試第二十一名 會試第十八名

浙江嘉興府秀水縣民籍附學生 鄉試第四十六名 會試第一百十八名

康熙戊辰科

狀元沈廷文

榜眼查嗣韓

探花張豫章

康熙辛未科

狀元戴有祺

榜眼吳昺

探花黃叔琳

浙江杭州府錢塘縣民籍監生 欽賜五經舉人 會試第三名

江南松江府青浦縣民籍監生 鄉試第五十七名 會試第三十名

江南松江府金山衛民籍歲貢生 鄉試第七名 會試第一百二十六名

江南滁州全椒縣民籍廩膳生 鄉試第十三名 會試第八名

順天府大興縣民籍廩膳生 鄉試第十四名 會試第十八名

康熙甲戌科

狀元胡任輿

江南江寧府上元縣民籍附學生 鄉試第一名 會試第七名

榜眼顧圖河

江南揚州府江都縣民籍監生 順天鄉試第十七名 會試第七十五名

探花顧悅履

浙江杭州府海寧縣匠籍附學生 鄉試第八名 會試第三十八名

康熙丁丑科

狀元李蟠

江南徐州民籍廩膳生 鄉試第四十六名 會試第二十七名

榜眼嚴虞惇

江南松江府華亭縣民籍副榜貢生 順天鄉試第三十六名 會試第四名

探花姜宸英

浙江寧波府慈谿縣民籍廩膳生 順天鄉試第十九名 會試第八名

康熙庚辰科

狀元汪繹

江南蘇州府常熟縣民籍監生 鄉試第五十六名 會試第二名

榜眼季愈

江南揚州府寶應縣民籍廩膳生 鄉試第四十九名 會試第二名

探花王露

河南歸德府柘城縣民籍增廣生 鄉試第十六名 會試第一名

康熙癸未科

狀元王式丹

江南揚州府寶應縣民籍拔貢生 鄉試第六名 會試第一名

榜眼趙晉

福建福州府閩縣民籍廩膳生 鄉試第五十四名 會試第三十二名

探花錢名世

江南常州府武進縣民籍歲貢生 鄉試第二十一名 會試第五十四名

康熙丙戌科

狀元王雲錦

江南常州府無錫縣民籍增廣生 鄉試第十四名 會試第二百六十名

榜眼呂葆中

浙江嘉興府石門縣民籍監生 鄉試第十九名 會試第七名

探花賈國維

江南揚州府高郵州民籍監生 鄉試第四十八名 欽賜丙戌科殿試

康熙己丑科

狀元趙熊詔

江南常州府武進縣民籍拔貢生 鄉試第五十七名 會試第二十七名

榜眼戴名世

江南安慶府桐城縣民籍拔貢生 鄉試第五十九名 會試第一名

探花繆沅

江南揚州府泰州民籍歲貢生 鄉試第七十七名 會試第一百六十名

康熙壬辰科

狀元王世琛

江南蘇州府長洲縣民籍廩監生 鄉試第九十名 會試第七十七名

榜眼沈樹本

浙江湖州府歸安縣民籍監生 鄉試第七名 會試第一百四十二名

探花徐葆光

江南蘇州府吳江縣民籍廩監生 鄉試第二十七名 欽賜壬辰科殿試

康熙癸巳科

狀元王敬銘

江南蘇州府嘉定縣民籍附監生 鄉試第二百十九名 會試第二十一名

榜眼任蘭枝

江南江寧府溧陽縣民籍廩膳生 鄉試第九名 會試第十四名

探花魏廷珍

直隸河間府景州民籍拔貢生 鄉試第一百九十九名 會試第八十四名

康熙乙未科

狀元徐陶璋

江南蘇州府崑山縣民籍廩膳生 鄉試第八名 會試第八十六名

榜眼繆曰藻

江南蘇州府吳縣民籍監生 鄉試第十四名 會試第一百二十五名

探花傅王露

浙江紹興府會稽縣民籍副榜貢生 鄉試第二十五名 會試第五十三名

康熙戊戌科

狀元汪應銓

江南蘇州府常熟縣民籍廩貢生 鄉試第四名 會試第六十四名

榜眼張廷璐

江南安慶府桐城縣民籍副榜貢生 鄉試第五十二名 會試第五十五名

探花沈錫輅

浙江杭州府仁和縣民籍副榜貢生 鄉試第十九名 會試第三十二名

康熙辛丑科

狀元鄧鍾岳

山東東昌府東昌衛民籍監生 鄉試第一百二名 會試第一百二十九名

榜眼吳文煥

福建福州府長樂縣民籍附學生 鄉試第二十九名 會試第七十四名

探花程元章

河南汝寧府上蔡縣民籍廩膳生 鄉試第十七名 會試五十二名

雍正癸卯恩科

狀元于振

江南鎮江府金壇縣民籍監生 鄉試第五名 恩科會試第二十九名

榜眼戴瀚

江南江寧府上元縣民籍歲貢生 鄉試第三名 恩科會試第二名

探花楊炳

湖廣安陸府鍾祥縣民籍廩膳生 鄉試第九十六名 恩科會試第一名

雍正甲辰科

狀元陳惠華

直隸保定府安州民籍廩膳生 鄉試第
二十六名 會試第一百十五名

榜眼王安國

江南揚州府高郵州民籍附學生 鄉試
第七十九名 會試第一名

探花汪德容

浙江杭州府錢塘縣民籍監生 鄉試第
十二名 會試第十二名

雍正丁未科

狀元彭啓豐

江南蕪州府長洲縣民籍附生 鄉試第
七十四名 會試第一名

榜眼鄧啓元

福建泉州府德化縣民籍 鄉試第
二十一名 會試第九名

探花馬宏琦

江南揚州府通州民籍 鄉試第
六十四名 會試第三十四名

雍正庚戌科

狀元周 霽

浙江杭州府錢塘縣民籍貢生 鄉試
第二十九名 會試第一百三十六名

榜眼沈昌宇

浙江嘉興府秀水縣民籍附學生 鄉試
第七十二名 會試第一名

探花梁詩正

浙江杭州府錢塘縣民籍附學生 鄉試
第五十九名 會試第二百二十三名

雍正癸丑科

狀元陳 倓

江南揚州府儀徵縣民籍附生 鄉試
第四十二名 會試第一名

榜眼田志勤

順天府大興縣民籍廩生 鄉試
第九十六名 會試第二百三十三名

探花沈文鎬

江南太倉州崇明縣民籍拔貢生 鄉試
第二十八名 會試第六十八名

雍正庚戌科

乾隆丙辰科

狀元金德瑛

浙江杭州府仁和縣商籍附監生 鄉試第七名 會試二百四十一名

榜眼黃孫懋

山東兗州府曲阜縣拔貢生 鄉試第五名 會試二百二十六名

探花秦蕙田

江南常州府金匱縣民籍監生 鄉試第七十七名 會試二百十二名

乾隆丁巳科

狀元于敏中

江蘇鎮江府金壇縣民籍監生 鄉試第七十二名 會試第三十三名

榜眼林枝春

福建福州府福清縣民籍廩膳生 鄉試第八十五名 會試第十四名

探花任端書

江蘇鎮江府溧陽縣民籍監生 鄉試第二十六名 會試第四十四名

乾隆已未科

狀元莊有恭

廣東廣州府番禺縣民籍拔貢生 鄉試第二十一名 會試第三十六名

榜眼涂逢震

江西南昌府南昌縣民籍附生 鄉試第九十名 會試第一百五十一名

探花秦勇均

江蘇常州府金匱縣民籍附生 鄉試第六十九名 會試第一百十名

乾隆壬戌科

狀元金 甦

浙江杭州府仁和縣民籍附學生 鄉試第一百十八名 會試第一名

榜眼楊述曾

江蘇常州府陽湖縣民籍監生 鄉試第四十一名 會試第一百二十三名

探花湯大紳

江蘇常州府陽湖縣民籍附監生 鄉試第一百八十名 會試第八名

乾隆乙丑科

狀元錢維城

江蘇常州府武進縣民籍監生 鄉試第十五名 會試四十一名

榜眼莊存與

江蘇常州府武進縣民籍監生 鄉試第四十一名 會試一百四名

探花王際華

浙江杭州府錢塘縣民籍附生 鄉試第九十五名 會試八十九名

乾隆戊辰科

狀元梁國治

浙江紹興府會稽縣民籍附生 鄉試第七名 會試一百二十三名

榜眼陳 栢

浙江杭州府仁和縣民籍附監生 鄉試第一百四十名 會試第一百五十五名

探花汪廷璵

江蘇太倉州鎮洋縣民籍附生 鄉試第一百二十六名 會試第二百二十八名

乾隆辛未科

狀元吳 鴻

浙江杭州府仁和縣民籍廩膳生 鄉試第一名 會試第二十二名

榜眼饒學曙

江西建昌府廣昌縣民籍貢生 鄉試第六名 會試第二十九名

探花周 澧

浙江嘉興府嘉善縣民籍廩膳生 鄉試第六名 會試第一名

乾隆壬申科

狀元秦大士

江南江寧府江寧縣增生 鄉試第十八名 會試第十五名

榜眼范棫士

江南松江府華亭縣增生 鄉試第一百五十五名 會試第一百二十名

探花盧文弨

浙江紹興府餘姚縣監生 鄉試第三十四名 會試第三十二名

乾隆甲戌科

狀元莊培因

榜眼王鳴盛

探花倪承寬

乾隆丁丑科

狀元蔡以臺

榜眼梅立本

探花鄒奕季

乾隆庚辰科

狀元畢沅

榜眼諸重光

探花王文治

乾隆辛巳科

狀元王杰

榜眼胡高望

探花趙翼

江南常州府陽湖縣民籍監生 鄉試

第七十九名 會試第三名

江南太倉州嘉定縣民籍副榜貢生 鄉試

第六名 會試第二十六名

浙江杭州府仁和縣民籍附學生 鄉試

第八十四名 會試第七十八名

浙江嘉興府嘉善縣民籍副榜貢生 鄉試

第二百四名 會試第一名

江南寧國府宣城縣民籍拔貢生 鄉試

第二十三名 會試第一百七十九名

江南常州府金匱縣民籍監生 鄉試

第七十三名 會試第九十七名

江蘇省太倉州鎮洋縣民籍附生 鄉試

第二十九名 會試第二名

浙江省紹興府餘姚縣民籍副榜貢生 鄉試

第九名 會試第十三名

江蘇省鎮江府丹徒縣民籍拔貢生 鄉試

第四十五名 會試第四名

陝西同州府韓城縣民籍副榜拔貢生 鄉試

第七名 會試第十名

浙江杭州府仁和縣民籍廩膳生 鄉試

第三十九名 會試一百六十六名

江南常州府陽湖縣民籍附學生 鄉試

第二十一名 會試第三十三名

乾隆癸未科

狀元秦大成

榜眼沈初

探花韋謙恒

江南太倉州嘉定縣廩生民籍 鄉試第
三十九名 會試第三名

浙江嘉興府平湖縣優貢生竈籍 會試第一百三十二名
欽賜舉人

江蘇太平府蕪湖縣拔貢生民籍 會試第四十六名
欽賜舉人

甲辰科 康熙三年

皇帝制曰朕惟古帝王撫育羣生莫不以興行振德
為首務以故俗尚醇茂賢才衆多吏有廉善之風
民無匪彝之卽其時刑措不用登於上理何其盛
也朕荷

上天眷佑之隆承

祖宗付託之重勵精求治三年於茲矣每思更化善俗

俾吏稱其職民安其業乃治效猶未卽臻豈廣厲
之道有未盡歟今欲誕敷教化使天下蒸蒸振興
為善其道何由至於考績課吏所以澄叙官方何

以使賢否不淆。激揚咸當。歟。明罰勅法。所以大畏民志。何以使庶獄平允。從欲以治歟。爾多士其各抒所見。詳切敷陳。朕將親覽焉。

臣嚴我斯

臣對。臣聞帝王之紹休烈而撫海宇也。必有經天緯地之弘模。無一事不受其裁成。而後德垂於可久。必有繼往開來之絕業。無一人不安其性命。而後功成於可大。德之所以可久者。權其本計而圖之。不恃法而恃人是已。百度允貞。端籍翼爲明德之才。承流宣化。故元首康而股肱良。莫不奉我后綏猷之治。以爲治。而共遵於立綱陳紀之中。功之所以可以大者。攬其全效而收之。不任術而任化是已。羣黎徧德。惟此撫字精寧之畧。幹止養恬。故朝廷正而草野安。莫不體維皇建極之心。以爲心。而相化於歛時錫福之內。故剗守有異時也。而無異道。不過使大法小廉。明刑弼教。納天下於平康正直之休。而皇猷始爲有要。繼述有殊勢也。而無殊法。不外此吏習民安。內和外順。開天下以時雍風動之象。而王路所以無偏。然則本計得而庶績咸熙。全

效收而多方永奠。端在今日矣。欽惟
皇帝陛下。

德配乾元。

位光離照。

陳九功而首出。治炳堯天。

大一統以凝承。化深禹甸。

泰交洽而山龍贊采。乃聖乃神。乃武乃文。聲教誕

敷。德廣運於日星河嶽。

鼎命集而梧鳳陽輝。揚有孝有德。有憑有翼。思皇媚

正。功攸暨於玉帛車書。

布神威以靖國。海不揚波。山無伏莽。羽千舞而萬

邦瞻如雲如日之儀。

覃保卹以寧民。人熙冬日。世躋春臺。稌黍歌而四

國協象風象雨之好。固已太平有象。茂駿業於

前王。景運無疆。肇鴻猷於奕禩矣。乃猶

聖不自聖。安愈思安。進臣等於

廷。孜孜勤詢。雖帝咨王訪。寧有過歟。臣躬居蓬華。志

切經綸。思攄一得之愚。以爲

典朝三拜獻者舊矣。矧煌煌

清問。實式加之。敢不敬陳所學。以拜揚

休命乎。臣竊常緬懷上理。頌法先猷。無爲恭已。庶政
修和。臣隣奏寅亮之績。間閭多擊缶之風。唐虞
之所以開治也。寬仁彰信。惠鮮懷保。治理隆而
雖休弗休。訓行昭而辟以止辟。三代盛王之所
以繼治也。偃武修文。采風省俗。舉賢良而興禮
讓。崇節儉而幾刑措。漢祖唐宗之所以求治也。
故一代之興。必有一代之人才以應之。君臣一
德。上下同心。於以贊嘉猷而弘休祿。垂諸史冊。
班班可考矣。今

國家撫運方新。肇基伊始。駕漢唐而躋陶姚。誠非
無術以處此。伏讀

制策有曰。更化善俗。俾吏稱其職。民安其業。乃治效
猶未卽臻。今欲誕敷教化。使天下蒸蒸振興爲
善。此誠

皇上嘉與維新之至意也。臣愚以爲風俗之患不一。
大端士習之澆。莫甚於奢。民風之替。必由於惰。
奢則放佚而不知所歸。廉耻喪。則法令不能坊
矣。惰則游蕩而不知所習。饑寒迫。則奸宄從此
生矣。天下之人。相習以爲固然。極其流弊。吏之
爲貪。民之爲盜。率由此耳。故教化之權。不貴有

其術而貴明其意。不貴重其名。而貴原其實。使天下咸樂於爲善。而不忍於爲不善。斯不必家論而戶曉之也。然而奢與惰之不可不亟治也。固有道矣。今爲計曰。正名分以定制。則奢僭之端。始不得而開也。禁淫巫以彰教。則眩惑之風。始不得而啓也。杜苞苴以養廉。則奔競之習。始不得而靡也。省車服以崇儉。則夸耀之尚。始不得而流也。重稼穡以勸功。則金玉之價。始不得而爭也。崇學校以端本。則囂凌之氣。始不得而張也。此所謂明其意而原其實。君子以之敦行。小人以之省業。又何虞教化之不行。而風俗之不善乎。伏讀

制策有曰。考績課吏。所以澄叙官方。何以使賢否不淆。激揚咸當。洵爲治之要圖也。夫言吏治於今日難矣。掣簽而使地之繁簡。毋論也。材之大小。毋論也。上而藩臬諸司臨之。又上而督撫諸臣臨之。賢否激揚。不憑治術爲短長。而視彌逢之工拙。不審揀守爲殿最。而視趨承之後先。故一行作吏。徃徃聲名之念輕。而思保其爵祿。甚至爵祿之念輕。而思保其身家。又何暇顧民間之

疾苦。而修廉耻之防維也哉。且夫催科之責既重。索派之令日煩。催之而應。民受其害。而吏胥奸蠹。且中飽其利也。催之而不應。則官受其累。而吏胥奸蠹。且陰蝕其肥也。今日之有司。從而督責之於上者如此。從而侵伺之下者如此。雖有清明廉謹之才。卓魯龔黃之行。有不掣肘而嘆者幾何哉。臣愚以課吏之法。必先懲胥吏之法。而考成之利弊清矣。課吏之小者以爲法。必先察吏之大者以爲法。而官方之邪正明矣。伏讀

制策有曰。明罰勅法。所以大畏民志。何以使庶獄平允。從欲以治。仰見我

皇上好生之心。與天地同德也。蓋立法貴乎至一。一者所以定天下之趨。而使之不敢有所犯。行法貴乎至公。者公所以服天下之心。而使之不敢有所怨。昔者子產治鄭。孔明治蜀。皆以嚴法行之。而不失於寬也。由是道耳。若夫法煩密。則民心怨。法多門。則民聽惑。而且猾吏得以任意。奸民得以生心。非所以昭軌物而樹坊表也。今國家不可有濫及之恩。尤不可有褻用之威。故入

與故出之法必均。從重與從輕之議必謹。至反坐之條。必重加申飭。以杜刁訟之風。庶幾雪冤者不至。或以錮冤除害者不至。反以滋害。將明允再見矣。抑臣尤有進焉者。二帝三王。為古聖神功化之極。未有外修身勤民。以圖治本者也。今

皇上承

天府而隆懋德。揚

祖烈而紹鴻圖。非修身無以大昭事之忱。非勤民無以見靈承之實。誠於二者加之意焉。則豐功偉業。

無難舉而行之也已。臣草茅新進。罔識忌諱。干冒

宸嚴。不勝戰慄。隕越之至。臣謹對。

丁未科 康熙六年

皇帝制曰。朕惟帝王統一寰區。必任用賢才。澄清吏治。使國有豐亨之象。民饒樂利之休。而後庶政畢修。羣生克遂。登上理焉。朕以冲齡仰承

天眷嗣續

祖宗鴻業。夙夜冰兢。期於俊乂充廷。廉能著績。國計日盈。而閭閻不擾。數年於茲矣。乃圖治彌殷。厥效未覩。其故何也。國家簡任賢良。以共襄治化。必如何

而後用當其才人稱其職歟邇來貪風未息誅求下吏以奉上官遂致不肖有司私派橫徵民生益困何法而可革其夙弊歟至於國用浩繁繫惟正之供是賴乃催科不善者每昧於撫字茲欲使草野免追呼之苦而度支恒足其道安在爾多士詳切敷陳朕將親覽焉

臣繆彤

臣對臣聞帝王之統御天下而綿曆服於無疆也必有其爲治之本焉必有其致治之要焉夫用人不可以不慎吏治不可以不清賦稅不可

以不均此三者固治天下之大端也而猶非其本也抑猶非其要也蓋所謂本者何也人主之一心是也所謂要者何也人主之以一心行仁者是也故仁以舉賢而愛惜人才則收用人之效矣仁以擇吏而澄清吏治則成廉潔之風矣仁以理財而撫循百姓則致豐亨之象而臻樂利之休矣唐虞三代之盛所以庶政畢修民生克遂而登上理者此道得也故善治天下者不恃有馭天下之術而恃有治吾心之道不徒有愛百姓之名而貴有愛百姓之實以是內之百

僚有師濟之盛外之羣吏有廉法之操上之府
庫有克盈之積下之間閭有康阜之風是堯舜
三代之豐功茂烈不難再見於今日者也欽惟
皇帝陛下

鴻圖克懋

龍德方升

孝思永言隆祖任母姜之尊養

惠澤普被備文謨武烈之顯承

文教著日出之區

武功及海隅之表四方皆已底定天下皆已治安
而猶

聖不自聖進臣等於

廷而諮以用人擇吏之道足國裕民之方雖帝咨王

訪寧有過歟以臣之愚陋非有藻鑑羣流之識

何敢言人材之用舍非有封疆牧民之責何敢

言百官之短長非有錢穀大農之計何敢言財

賦之充詘然臣嘗聞柳宗元曰思惟報國獨有

文章又聞歐陽修曰士患不見用及用也又曰

彼非吾職不敢言是終無可言之日也今煌煌

清問實式加之其敢不竭千慮之一得以對揚

休命乎臣嘗緬懷上理追念先猷而知古帝王爲治之本無過內治之心而治心之要無過吾心之仁何也蓋有純王之心斯有純王之政言政之必本乎心也有關雉麟趾之風斯可以行周官之法言心之可以立法也故欲求國用之足未有不由民生之遂而可得也欲求民生之遂未有不由吏治之賢而可得也欲求吏治之賢未有不由用人之慎而可得也欲求用人之慎未有不由

皇上之仁以立心而可得也惟我

皇上夙夜冰兢期於俊乂克延廉能著績以裕國計而慰民生者誠莫踰於此矣伏讀

制策有曰國家簡任賢良以共襄治化必如何而後用當其才人稱其職此我

皇上闢門籲俊之盛心也朝廷選用人才非苟慕其才而富貴其身也殆將用其能以理不能用其明以理不明者耳其在詩曰菁菁者莪在彼中阿言所以長育人才之道也故方其未用也常患其多及其旣用也恒患其少與其用不足而後取何如多取以待用凡有人而不用與用之

而不當皆可惜也故賢能不可不惜也以內而
言之臺省之內升本以賢能而升者反逸之山
林之內升而候缺不如遇缺後升久置之拾遺
補過之列非無益也外而言之監司郡縣之轉
遷亦以賢能而升者又留以未竟之案有功而
升者仍以有過而留苛求於錢穀刑名之間亦
已甚也總之知人則哲惟帝其難必得知人之
佐而行以保任之法然後真才輩出矣臣每見
今之在位者見一賢焉若親與邇不敢舉也見
一不善焉若疎與遠不敢去也問其故曰避嫌
也避嫌之念生而積行之君子壅於上聞矣臣
故曰仁以舉賢則愛惜人才而可以收用人之
效者此也伏讀

制策有曰貪風未息誅求下吏以奉上官遂至不肖
有司私派橫徵民生益困何法而可革其夙弊
興言及此真百姓之福也夫今日之百姓誠苦
矣苦於有司之剝削也今之下吏亦苦矣苦於
大吏之誅求也大吏之取於小吏必飾其名曰
公費不知藏之私橐之中者爲公乎爲私乎有
司之取於百姓者飾其名曰樂輸不知得之敲

唐際 卷之十
一
扑之下者爲樂乎爲怨乎臣恐雖文致其辭而終無以掩人之耳目也於是一田之入而有兩田之出使吾民曾不得賣絲而糶穀焉一定之稅而有無定之徵使吾民曾不得聚廬而托處焉耒耜方思東作而輸將不待西成使吾民曾不得水耨而火耨焉貪吏之弊一至於此民生安得不日困乎以臣計之懲貪之法不可不嚴也懲其吏之小者不若懲其吏之大者夫大吏之貪不止賦歛無度已也其位愈尊其害愈大其害愈大而人愈不敢言卽有不畏強禦之臣出力而排之不過舉其大槩而不能悉其實事也莫如訪其貪之最者而懲之彼貪冒無耻止爲室家妻子計耳以今日居官之所得爲後日平居之所樂何憚而不爲之惟行漢世懲貪之法宋人禁錮貪吏之制彼又何利而爲此耶此非過於刻覈也蓋除吏之蠹也去民之害也殺一二人而天下皆生也是天下之至仁也臣故曰仁以擇吏則澄清吏治而可以致廉潔之風者此也伏讀

制策有曰國用浩繁緊惟正之供是賴乃催科不善

者每昧於撫字茲欲使草野免追呼之苦而度
支恒足此以見愛民裕國之弘模也夫今之賦
猶古之賦也今之民猶古之民也何以古則上
有餘而下無不足今則上未嘗有餘而民又患
不足豈非撫字催科之道得則俱得失則俱失
者乎故善催科者必爲民治農桑焉必爲民廣
蓄牧焉必爲民緩刑罰焉必爲民通有無焉如
是而民力裕矣民力裕而上之所求無不應矣
不善催科者惟日夜取民之財窮民之力日削
月朘寔以大窮將元元安所歸命哉臣嘗觀小
民之家其初牛羊菓蔬熙熙然若爲子孫百年
之計也者一往過焉則爲墟矣再過三過焉則
又爲墟矣問之其隣或曰逃亡也或曰賦重而
不能守也是非催科之所迫而然耶故撫字之
道不可不講也惟

皇上弘豈弟之恩立慈惠之師使天下之爲吏者寓
催科於撫字之中則上有倉盈庾億之慶兼撫
字催科之內則下有家給人足之風矣臣故曰
仁以理財則撫循百姓而可以致豐亨之象臻
樂利之休者此也然臣反覆深思欲爲

皇上更進一籌而終無易於仁以存心之爲要也書
曰皇天無親惟仁實親又曰民罔常懷懷於有
仁此之謂也臣草茅新進罔識忌諱干冒
宸嚴不勝戰慄隕越之至臣謹對

皇帝制曰朕惟帝王誕膺天命撫御萬方莫不以安
民興賢爲首務朕纘承

祖宗

鴻緒孜孜圖治民生休戚日厯於懷而治未臻於
邇隆其故何歟今欲家給人足以成豐亨樂利之
休何道而可興賢育才原以爲民今旣崇經學以
正人心重制科以端始進乃士風尙未近古以致
吏治不清民生未遂果陶淑之未善歟抑風俗人
心習於浮僞徒徇名而失實歟必如何而能追棫
樸作人之盛以幾時雍之化也我國家揆文奮武
禮樂之彥韜鈴之臣兼收並重何以簡用得人使

才稱其職廟堂著亮采之功封疆有干城之效歟
在外地方大吏惟督撫是賴牧民之官守令最親
必表正而後景直欲使大法小廉遵功令而脩職
業以爭自濯磨將何術之從歟漕糧數百萬取給
東南轉輸於黃運兩河何以脩濬得宜而天庾藉
以充裕俾國收其利民不受其害其必有道以處
此爾多士志學已久當有確見於中其各摠夙抱
詳切敷陳朕將親覽焉

臣
蔡啓傳

臣對 臣聞帝王車書一統啓萬年有道之長也

有至德之光被以昭法紀之隆焉有令業之弘
開以彰道化之遠焉法紀隆則天下赫聲濯靈
服聖人之大畧道化遠則天下澄懷滌慮佩聖
人之深心瑞曆膺而萬幾攸集其最繫王心者
在民生之休戚與人才之得失唯秉寬和以服
物操明斷以平衡然後殷盈見而化理昌嘉謀
嘉猷日陳於前大畧以深心而益懋鴻圖肇而
治理畢張其最關國體者在文武之宣猷與東
南之轉運唯衷前王以立極期至善以垂模範
後羣猷著而國計克規爲制度燦然具備深心

以大畧而愈彰蓋體道以爲法而法始無愆爰
正紀綱章軌物皆本清明之志以相孚不識經
緯之何從而成萬國咸寧之治亦因法以求道
而道爲有用爰審張弛裁沿革皆推純正之意
以宣化立見敷施之旣裕而臻四海和協之徵
調休風於玉燭鞏大業於金甌端有在今日矣
欽惟

皇帝陛下

道貫三才

功高百辟

紹堯爲舜欣瞻松日之祥

繼武纘文永慰雲霓之望

炳離光於南面運符五百載之昌期

毓震旦於東方曆憲億萬年之大統

垂裳而貞百度凡屬心知血氣咸沾天覆地載之

恩而衆志之允懷率廸者所在塗歌而巷舞

錫命以懷萬邦不殊南北東西共惕雷厲風行之

象而庶績之其疑成理者罔不崇實而去名固

已方駕唐虞登三咸五而躋世於雍熙矣乃猶

聖不自聖進臣等於

廷而諮以民生休戚與賢育才且復諄諄於文謨
武烈國計克臆之是慮雖懸輅設鐸何以加茲
臣志切匡時有懷欲吐久矣敢不竭管見之愚
以仰佐

高深萬一乎伏讀

制策有曰民生休戚日厯於懷而治未臻於邳隆今
欲家給人足以成豐亨樂利之休誠

撫恤民隱之盛心也以臣計之裕國必先裕民草野
之阜康卽爲朝廷之美利富民實以富國宮府
之經制無非閭里之輸將誠深維乎上下相通

之故而知天地之利原自在於民間萬世之資
尤在開於一日非僅圖目前權宜之計已也故
人主爲斯民策久遠不可使有餘之見常存於
一人之意中尤不可使不足之形時見於百室
之婦子是在

皇上以恤民之實心行勸民之實政三推九推以率
先之司農司峻以董治之使生穀之田盡墾而
地無餘力游食之民盡農而民有餘利更爲輕
徭薄賦以紓其困三年九年以厚其藏豫大豐
亨之象不再見於今乎

制策有曰興賢育才原以爲民今旣崇經學以正人心重制科以端始進乃士風尚未近古以致吏治不清民生不遂原所由來端因士氣之不振開之也然士氣之純雜在養之於平時而非勵於一旦苟素習不端及其一行作吏無惑乎寡廉鮮恥宴然民上而恣其貪殘欲民之各遂其生也何可得哉董正之法當責之教官以教官之與士習也然尤在宗伯督學使學使督學官而以教官督士吾未見上有董率之人而子弟猶不謹者也品節旣著平時自不以廉隅而易其守於以膺民社之寄則有利而利必興有弊而弊必去治負龔黃之譽俗臻仁讓之休其有浮僞以相矜者乎曰無有其有徇名而失實者乎曰無有於以追樸棧而幾時雍不難矣至於揆文奮武禮樂之彥韜鈴之臣兼收並重誠如制策所云簡用得人使才稱其職然望我皇上慎以處之公以行之明以斷之今日之選授可云公矣然職之繁簡才之短長未易辨也常使職之餘於才者或至才餘於職所貴本至明之心而行之以至慎而後可以勵其始然今日降

革之科常如傳舍而拔擢之典每至淹留不患
在資格之不循而患在資格之過循唯過循則
予之久任以重其權示之超遷以優其典者無
有也長才未必有越次之升者短才未必無依
次之轉所貴本至公之心而行之以至斷而後
可以要其成我

國家文武並重統轄各有專司然而表正之權全
在撫提以下屬之賢否撫提能悉之下屬之貪
廉撫提能制之正恐撫提之心未必盡體

皇上之心則下屬之心又焉能祇承撫提以仰副

皇上之期許乎昔云文不愛錢武不惜命其謂之何
誠嚴其督責而力行之則不敢以僚屬之毀最
自累其功名則舉劾必當而大法小廉爭自濯
磨於

聖世矣夫天庾之積貯咸仰藉於東南而轉輸無策
每爲民害

皇上殷然及此誠萬姓之恩波也臣謂徵納出自民
間而轉輸半由天事蓋黃運兩河互爲表裏第
運河之修濬全在備禦之得宜黃河則旋決而
旋築且屢築而數決以水衡數百萬金錢置之

洪濤駭浪中而靡有止息是未受充裕之利而先墜耗費之虞矣且也蓄洩之不時而挑築每爲民害則轉輸之善策無如專其權於總漕兼其任於總河使漕不受制於河而漕利使河得分治於漕而河亦利是非予以重權責以久任不可益任久則河之情形自熟而疏濬利導之得宜權重則責之旁貸無辭而諉卸游移之弊絕將見奏安瀾之慶坐收紅朽之腴庶幾酒漿飗遂與心膂而偕來乎抑臣更有進焉唯願皇上以古帝之心爲心且通乎左右輔弼之所以爲

心雖不必日陳經史無徃非經史之敷陳亦不必日御經筵無在非經筵之開導蓋實有遜志時敏之心而後延訪之卽爲躬行也實有舍己從人之志而後諮謀之卽爲達務也豈非德爲可久之德業爲可大之業以昭法紀則民風士習胥致於雍和而朝野樂觀其盛以彰道化則大法小廉盡歸於亮采而文武共効其誠若所謂百靈效順河嶽懷柔時占大有史紀嘉祥則又

聖世之餘事矣臣草茅新進罔識忌諱干冒

宸嚴無任戰慄隕越之至

臣謹對

臣孫在豐

臣對 臣聞帝王之膺圖御宇也有治人而後有治法帝王之得人致治也有實心而後有實政何謂治法綱紀聿脩制度釐定模猷畢備以爲經理天下之大猷是也何謂實政內外承流遐邇宣化聲教四訖以爲維繫天下之大本是也治法之立必有所以立則不存乎治法而存乎行法之治人實政之行必有所以行則不存乎實政而存乎立政之實心以治人而行治法司

牧民者必思何以厚民之生董士風者必思何以正士之習揆文者思文教之何以宣奮武者思武衛之何以振課績何以稱職而輓輸何以克前任之以行法之人而有餘以實心而行實政司牧民者必實有以厚民之生董士風者必實有以正士之習揆文者使文教之有以宣奮武者使武衛之有以振課績可以稱職而輓輸可以克前承之以立政之心而甚易然則以行法之人盡立政之心而聿登上理端在今日矣

欽惟

皇帝陛下

德咸五而登三

業光前而裕後

巍乎功煥乎文同唐帝之允恭光被

顯哉謨承哉烈邁周王之訪落紹庭

神周萬里而勿遺求民瘼飭官常問俗省方兆姓

協象風象雨之好

心接百王而在宥鼓人才崇學校臨雍講藝多士

瞻如雲如日之儀行將治高千古永享太平矣

乃猶

聖不自聖新且日新進臣等於

廷詢以愛民圖治之道臣愚何足以知之雖然昔

賈誼曰驗諸徃古按諸當今之務日夜念此至

熟也蘇軾曰上以名求之下以實應之臣讀古

人之書學古人之行事竊有志於當世之務惟

恐學焉而不得言言焉而不得達今幸近咫尺

之威立堂簾之下煌煌

清問實式加之敢不俯竭愚誠以對揚

天子之休命乎臣思唐虞之致治也惠疇亮采和衷

協恭師師濟濟以臻時雍風動之休三代之致

治也三宅三俊有馮有翼克知灼見以成太和
熙皞之俗從來治化隆茂風俗醇和未有不以
治人行治法以實心行實政而致久安長治之
模也今我

皇上凝休撫御奠安萬方以安民興賢爲首務此誠
治思益治安愈圖安之意也臣愚以爲安民必
有所以安之之本興賢必有所以興之之道亦
惟以人行法以心立政務其實而不務其名而
已矣伏讀

制策有曰續承

祖宗鴻緒孜孜圖治民生休戚日厯於懷而治未臻於
邇隆今欲家給人足以成豐亨樂利之休此誠
皇上愛民之心勤民之意與天地同德也夫生民之
至計莫大於耕桑而閭閻之日用莫急於衣食
今休養皆已有條撫字皆已有績田野皆已漸
闢農政皆已日脩而耕桑之源猶有未盡開衣
食之用猶有未盡節爲今之計莫若開其源節
其流以厚民生而登盛治無難也開其源者何
也王制曰三年耕則有一年之蓄九年耕則有
三年之蓄以三十年之通制國用然後民無菜

色今惟重農政以爲本務緩催科之令而耗蠹
不以滋薄徭役之徵而追呼不以擾嚴游惰之
禁而流曠不以憂則民生厚而民俗阜矣節其
流者何也昔人云一人耕之十人聚而食之欲
無饑不可得也一人蠶之于人聚而衣之欲無
寒不可得也今惟嚴服式之制而去履絲綦縞
之風重宴會之禁而惜中人寸家之產則奢侈
日革而生息日繁矣伏讀

制策有曰興賢育才原以爲民今旣崇經學以正人
心重制科以端始進此誠

皇上所以端士風之趨嚮清吏治之本源以隆陶淑
之化也乃猶以風俗人心習於僞徒徇名而
失實欲追樸棧作人之盛以幾時雍之化必有
道以處此矣夫從來風俗之厚不關乎風俗而
關乎主持風俗之人人之心之正不在乎人心而
在乎表率人心之具古之帝王懸之以象魏頒
之以條教章之以物采陳之以藝極凡所以整
齊天下約束天下者固有潛孚默運之機而不
徒制度文爲之迹也今惟脩其實而不脩其名
司學校者必如陽城之在國子胡瑗之在湖州

而不徒委瑣葺闕以稱位知郡縣者必如仇香
之以德化民延壽之閉閣思過而不徒簿書期
會以稱賢行將化行俗美四海同風矣伏讀

制策有曰我

國家揆文奮武禮樂之彥韜鈴之臣兼收並重此
皆

皇上廣運之德乃武乃文之盛治也夫古昔盛時一
張一弛號爲善道剛克柔克協於皇極周公冢
宰實兼東征畢公爲公亦總司馬武夫堪腹心
之寄吉甫有文武之稱天保治內而未嘗無武

采薇治外而未嘗無文文武之爲用甚重也今
欲簡用得人使才稱其職惟

皇上以知人善任之心加以鼓舞激揚之道必使廟
堂著亮采之功而封疆有干城之寄矣伏讀

制策有曰在外地方大吏惟督撫是賴牧民之官守

令最親必表正而後景直欲使大法小廉遵功

令而脩職業以爭自濯磨將何術之從臣愚以

爲在甄別大吏而已矣督撫廉則守令有素絲

之節督撫正則守令有解綬之風督撫勤慎則

守令有心勞之績矣表正景直端不外此至於

漕糧數百萬轉輸於黃運兩河此誠

國計之重天下之大命也今欲修濬得宜俾

國收其利民不受其害亦惟得人以重其責相其
勢之所亟或濬或塞賈讓之中下兩策今所必
講也若此者無治法之可拘而有治人之可擇
無實政之可恃而有實心之可圖誠得治人以
行治法有實心以行實政則綱舉目張將無法
之不備而無政之不隆矣書云知人則哲惟帝
其難之我

皇上天亶神靈究知人之本則惟讀書而後能明理

惟明理而後能知人尤其最要且切所當留意

者歟臣草茅新進罔識忌諱于冒

宸嚴不勝戰慄隕越之至臣謹對

臣徐乾學

臣對臣聞古帝王之受天命而撫萬邦也必有

愛養天下之仁以垂萬年之利澤亦必有鼓舞

天下之道以興一世之賢才厚民之生正民之

德四海爲一家兆民爲一人利澤所由溥也脩

舉政教建立紀綱彼此相維內外相制人材所

由奮也制治以養民爲急而使布憲者祇承其

意乃有以收去弊興利之實益而令甲不爲具
文分職以用人爲要而使服官者樂見其長乃
有以鼓殫智竭能之精心而臣僚不爲曠位法
非具文則以人行法法不期於過密而必不致
扞格而難行人無曠位則以法檢人人不必其
皆賢而必不致因循而容不肖雖法有所及亦
有所不及而綜核名實足以周通乎庶務所由
張弛而咸宜雖人有所能亦有所不能而黜陟
幽明足以震動乎羣心所由激揚而爭奮是則
贊采所以宜民而承流宣化無一人之不職也
亮工所以熙載而經邦定國無一事之不理也

欽惟

皇帝陛下

函三在宥

得一乘時

建極以錫庶民

執中而衡萬物

神功內運敷天仰覆載之無私

大武旁昭溥海誦聲威之有截

視朝昧爽咨揆岳而詢事仿虞廷之吁咈都俞

駐蹕時巡進父老以陳風邁夏王之鐸鞀鐘鼓
 政兼富教六府惟脩三事惟和黎民遂登於敏德
 治洽神人五紀用平三德用乂庶草亦底於蕃蕪
 固已化美時雍人歌順則矣乃猶進臣等而
 親策之咨以安民興賢之務首舉民生休戚欲使家
 給人足而又慮士風未古以致吏治不清深思
 樸棧作人之盛典言及此天下萬世之福也臣
 請得備陳之臣惟安民之道在去其所以擾我
 民者而已民承故明疾徵橫歛之餘貪吏之賸
 削者深繼以凶荒兵燹救死扶傷之不給

國家之興固已出之湯火之中登之衽席之上矣
 然自平定安輯以來休百姓之力者二十年於
 茲而生齒未蕃荒萊未闢閭里蕭條而蓋藏猶
 乏也惟我

世祖章皇帝勤思疾苦視民如傷

皇上繼之以容保無疆之至德錢糧之逋欠蠲豁者
 及乎康熙三年以前矣畿輔秦齊一方之水旱
 發帑金而賑濟矣田土之圈占永停藩產之變賣悉
 罷而且

軫恤准揚災荒之困並漕糧之從不准蠲者違部議

而特免矣

皇上愛養元元之意維持而護惜之凡可以爲民者

何一不立見諸施行哉而民力困窮猶甚者

臣

以爲農政未脩也長吏奉行未善也穀賤金貴而民病也天下有十畝共桑之地亦有曠野不發之田宜設勸農之官闢地利脩田功陂塘水利在在舉行阨塞形勝如蜀中諸郡秦之西代之北中州南汝之間皆膏腴地也兩稅三限唐宋以來之制今者庫金缺而不得不亟徵于春時則稱貸歲多而民困本色賤而不得不取盈

於拆色則白金日賤而民愈困而且有司之因公科歛借利營私者比比也宜復夏稅秋糧徵收之制嚴察郡縣之厲民一切不以擾民而妨其蓄殖閭閻庶乎饒足也漢唐之代以帛爲租宋始用錢金章宗鑄銀曰承安寶貨公私迄今用之礦脉久閉海舶已停民間之銀日耗而不生而上供者必以常額宋齊丘有言錢非耕桑所得以錢收稅是教民棄本逐末也臣謂宜擇公忠強幹之臣權萬物之有無計百姓之盈絀而爲之通融將懋遷之化上比有虞生生不匱

而財源自裕也若夫興賢所以爲民而崇經學
重制科

皇上臨雍釋奠敦厲師儒崇起教化猗歟盛矣而士
習未醇者何也兩漢以來刺史守相得以參辟
召之權魏晉而後九品中正得以操人物之柄
考以里閭之毀譽試以曹掾之職業其法猶爲
近古自隋唐至今所試者詞章而已所拘者資
格而已自掣籤之例起于故明萬曆中年用以
防姦則可耳以言得人則未也成例彌拘而銓
除彌以失當選舉彌多而人材彌以淹積更調

彌數而民生彌以困弊豈舉能其官之意乎禮
義廉耻國之四維近者浮夸躁競浸以成風求
薦達則自詡才能上章奏則侈陳勞勤恬退者
目爲闒冗廉靜者鄙爲無能至乃世祿之家以
奢麗爲好尚能文之士以輕薄爲風流尤而效
之將何底止臣謂宜於成法之拘闕者變而通
之無使盛德尊行之人拘格而遑回無使矯亢
謬悠之人虛名而進拔獎恬抑競革薄從忠風
俗人心可得而正吏治可得而清也至如
聖制所云揆文奮武大法小廉馭天下之大道也

國家文教誕敷武功赫濯禮樂之臣與于城之寄
兼收並重矣臣聞古之帝王崇儒講藝期門羽
林皆通一經而於時亦選材力勇武者爲輕車
騎士常於春秋講肄課試今縉紳之士明習掌
故通達治體固不多有而武臣有不能跨馬穿
札者綠旗之兵分營別戍不若八旗之精武舉
武生冒濫更甚清汰而訓練之古蒐苗講武之
意也

皇上之重督撫也慎擢舉嚴責成居官治狀備加咨
訪

召見面詢訓戒諄諄屬吏有賢能請留請擢違部議
而曲

允焉任至專矣守令各官有卽陞之條有卓異行取
之例又甚優渥矣然皆斤斤不違教令不犯科
條苟幸無過而未皆奮發有爲者也宜嚴懲貪
之法而寬課吏之條無徒事于簿書期會之間
一以清廉惠愛爲重則人思盡職矣兩河者
國家藉以轉漕而近者白濟以北如綫河則歲屢
衝決泗鳳高寶之間爲患更甚宜令河漕二臣
各治上流下流之水以漕輓分責之相度緩急

而早爲之計河流可得安瀾也此所謂以人行
法而無扞格之憂以法檢人而去因循之弊愛
育天下之仁亦鼓舞天下之道也而臣以爲本
於

皇上之一心夙夜宥密之中必有以灼見萬事之本
原然後可以御天下之順而不亂變化云爲之
際必有以謹守方寸之初動然後可以定天下
之一而不搖書曰一日二日萬幾又曰安汝止
唯幾惟康此安民興賢之本而綿

國祚於億萬斯年者也

臣

草茅新進罔識忌諱干

冒

宸嚴不勝戰慄隕越之至

臣

謹對

癸丑科

康熙十二年

皇帝制曰朕惟自古帝王以仁心行仁政無不以萬物得所爲已任其時豐亨克奏教化覃敷人無狙詐之心戶洽淳龐之盛馴至遐荒向化頑梗率俾訟獄息而兵革消風雨時而休徵應何風之隆也朕纘承

祖宗鴻緒撫御萬方夙興夜寐冀登上理

乃府事未盡修和治道未臻醇備尚德緩刑之令時頒而仁讓未興發帑蠲租之詔屢下而休養未遂意者審幾度務設誠制行之源尚有未究者歟

夫治獄之吏以刻爲明古人之所戒也近見引律多煩駁察誣良時見叅奏出入輕重之間率多未協於中何以使民氣無冤而讞法克當歟積貯爲天下之大命乃常平之設多屬虛文一遇荒歉卽需賑濟而奉行不實致使朝廷之德意不能徧及閭閻其何以使利興弊革歟古者耕九餘三卽有災祲民無譏色其道有可講求者歟夫有治人始有治法行實政必以實心今欲疎禁網以昭惇大緩催科以裕蓋藏務使物阜民安政成化洽以庶幾於古帝王協和風動之治抑何道之從也爾多士蓄積有素其各摠所見詳切敷陳毋泛毋隱朕將親覽焉

臣韓 茨

臣對 臣聞帝王欲舉治天下之大法必先有以倡天下之人心夫心者萬事之權輿至治之根抵也世有百年必敝之法而有萬世可以無弊之心爲政而不本之以心雖舉唐虞三代之法施之而無一可古之聖王不能以身勞天下而惟以心勞天下其分猷布化則寄之百官有司其兼總條貫則付之紀綱法度而其子愛元元

忠利惻怛之實心必有餘於用人立政之外者
以勸其羣臣之遞相倡也以率其下漸磨陶冶
淬厲鼓舞務盡出其精白不欺之心以爲天子
拊循斯民之具何者當興何者當革若何而可
若何而否張弛寬猛休養生息君臣相與早作
夜思無往而不得其當由是衣食足而積貯充
教化行而獄訟息暴民不作兵革不試而卽有
水旱不時之虞無改乎閭閻樂利之舊馴至四
方從欲協和風動人事修於下天休應於上陰
陽以和風雨以時則惟聖王能帥其臣以實心
行實事之所致而非徒法嚴令具一切隨事補
救潤飾吏治之所可幾也欽惟

皇帝陛下

得一居貞

兼三出震

定黜陟而澄吏治遠媿雲師龍紀之遺

因燠暘而念民依務協畢雨箕風之好

覃敷文教而益講於道德仁藝常使史誦詩士獻
箴

底定武功而不忘乎獮狩蒐苗共美右騶虞左狎

首

淑問既已揚於疆外

湛恩既已普於羣生庶績既已受成百神既已順

職乃猶進臣等

親策之以府事未盡修和治道未臻醇備而欲究於

仁讓之化休養之澤審幾度務設誠制行之源

此真公聽並觀懸輶設鐸之盛心也臣請得而

備陳之臣惟獄者天下之大命和氣之所由致

災沴之所由生也我

皇上深矜庶民之不辜時沛更新之恩屢下停刑之

令而且寬失出之罰重矜疑之典禁慘酷之刑

所以戒枉濫者至矣而民猶或多寃者何也

制策曰引律多煩駁察誣良時見叅奏臣以爲今日

刑獄之刻正在於駁察苛於前而叅奏隨其後

也古之治獄者蓋使之意論輕重慎測淺深寬

然得盡其心焉今白臬司上讞毋論或重或輕

而必以駁察爲例有司苦於其上之苛刻繳繞

也乃逆窺竟指之所向而文致罪人之辭以求

一當究之出於罪人之供者實非出諸其人之

口者也而上下文移公名爲妥招夫招而曰妥

是徒幸免駁察而不顧生民之命者矣臣謂宜少寬假臬司之叅駁而第慎擇其人焉以寄一方之民命則庶乎其可也而臣尤有請者在戒例而一從律古者律一成而不可變而復有疑有比是律之中已不勝其權衡變化而不必預增例以預擬之也今常例之外條例日增徒使輕重上下得易以爲奸而已矣且夫法亦顧用之若何耳劓刑椽黥虫尤之刑而唐虞仍之不聞其或濫五刑三千法莫詳焉而周之中葉其聞其召祥刑之當否果不在法之詳畧也又况

今之律所謂以准皆各其及卽若八字之義亦已盡乎小大之比豈猶不足而復議例乎恭惟制策念積貯之當務而洞晰夫常平之設多屬虛文賑濟之恩奉行不實臣以爲今日欲行古者遣人委積之法則迂如近者頻下賑濟之令亦難爲繼欲倣古者平糴之制又恐有結糴俵糴括糴之弊若欲一恃於常平則出納歛散之不時蓄積之不實今亦旣見之矣而臣竊以爲今日惟社倉之法猶可行也誠各委一方之守令俾請其鄉之耆宿有才德者勸民量輸其粟而特

欵之而時出之少加其息以償腐耗其行之也
以鄴鄙而不以縣其主之也以鄉人士君子而
不以官其勸之也以忠厚憐怛而不以督責苛
急於以禦凶荒也其庶幾乎若夫

制策所云耕九餘三卽有災祲而民不饑者此則足
民之本計也臣謂今日足民之道有三曰減賦
曰緩征曰減餉今賦稅既有定額似不可復減
然古者十而稅一又或十五稅一三十稅一則
今他省之額最輕者猶爲重也而江南一省之
入至六百餘萬欠釐毫以上輒罪之及上計簿

而欠者亦數百萬也此數百萬者民不敢欠而
官不能有也則安歸乎夫徵發急則奸欺易生
條目多則侵蝕難詰勢不得不議停亦不得不
議蠲則曷若少留有餘於民之爲利乎臣請卽
一省以例其餘權其輕重苟有可少寬減者減
之藏富於民卽餘富於官此時務也緩征之說
諸臣請之數矣言之切矣

皇上亦欲行之再三矣而格而不遽行者以協餉之
故則臣請言減餉之說古者一州之入必足當
一州之出姑以戰國時言之養兵百萬而不仰

給於他國今天下大定而餽餉不絕如歲歲用
兵竭中原民力之供輦輸於嶺海之濱絕遠不
毛之地而所在雄藩大鎮外挾一二竄伏山滌
之餘孽以自重而內以邀於

朝廷日耗司農不生不息之財以厭其子女玉帛無
窮之欲此豈可爲繼而輒因循而不變乎

臣請

於兵之可撤者撤之其必不可撤者則留屯田
古者常且戰且屯今正當養兵不用之時其力
尤可用且往者兵在湟中則屯湟中在淮則屯
淮在許則屯許在振武則屯振武在烏孫伊吾

則屯烏孫伊吾安得藉口無可耕之田乎或猶
有不足則姑以近省之餉量給之俟行之數年
佃作盛而軍實克乃盡舉協餉而罷之協餉停
而征可緩賦可減矣緩征減賦而民有餘財則
可以耕九餘三遇災祲而無菜色矣凡此數條

臣敢因

聖策而盡其愚雖然爲政有本致治有要則

臣以爲

必先於倡天下之人心以實心行實政而後可
也宋儒朱熹有言世有二蔽有法蔽有時蔽法
蔽可救之以法時蔽必變之以心今百僚師師

庶事具舉然諸臣或畏罪之念重而踴躍之意
輕功名之慮深而忠愛之誼薄推委瞻徇之情
多而公忠任事之氣少則或者御臣之道亦有
未至也臣謂宜推忠信以結之寬文法以優之
破資格以異之豐祿餼以勸之崇尚聖賢之實
學以砥其禮義廉耻之防試以當世之要務以
觀其經理才幹之實漸磨陶冶淬厲鼓舞而向
之數條者可以付之其人有餘矣然其本要在
皇上之一心誠夙夜講學一本於戒謹畏懼之至意
則德業益克矣恭已出治而一將以吁咈咨儆
之實心則萬幾益勅矣側身修省齋居淵默而
一出於敬

天之誠則嘉祥致矣冬寒夏暑祈福請命而實格以愛
民之心則生養遂矣此所謂以仁心行仁政而
政成化洽無一物不得其所以進於古帝王協
和風動之治者也臣草茅新進罔識忌諱干冒
宸嚴不勝戰慄隕越之至臣謹對

臣王鴻緒

臣對臣聞帝王當繼治之日而欲行仁政以大
萬年之業必使布之朝者無不興之教養奉之

下者無不協之刑名備之國者無不克之積貯
則實心與實政偕行將見德教隆而禮讓興禁
令寬而民生樂熙熙然臻於上理而一人亦可
端拱無爲以受化成於其上今天下之進言者
莫不曰政教皆已覃被獄訟皆已衰息閭閻皆
已豐裕朝野皆已樂業可恃以久安長治矣而
不知未也天下非未治未安之足患而已治已
安之爲可虞亦非已治已安之可虞有已治已
安之形而無已治已安之實爲可虞也何謂無
治安之實夫慈惠不可謂不加而治道何以有

純雜之分平反不可謂不詳而律令何以有輕
重之失賑恤不可謂不至民生不可謂不計而
草野何以有未克之財教養何以無並隆之治
此非時勢之所謂也聖人知其然故嘗宰天下
之大道以審天下之大務斯以底至治而無歉
欽惟

皇帝陛下

秉峻德以乘乾

建鴻功而保泰

小心昭事虔黃琮蒼璧之誠

大孝成乎尊關石和鈞之制

經筵肇啓傳心傳政綜數百王理學淵源

起居有書記動記言垂億千載紀綱模範

舉耕藉之鉅典西成東作農政劭而粒我蒸民

弘講武之雄圖內重外輕軍實修而域彼四海

欽恤咨司寇五刑五服五流五宅務崇寬簡咸稱

大寶曰仁

蠲賑勅地官九貢九賦九職九功治底誠和允誦

庶邦惟正英賢豫附將馮翼孝德並效謨猷草

野雍熙若侯甸要荒咸登衽席固已四靈偕集

奏萬年有道之祥五德同庥昭曆服無疆之慶

矣乃治求益治爰進臣等於

廷而詢以尚德緩刑之治休養生息之方雖懸詔

設鐸建鼓植旌之盛何以加茲臣志切匡時有

懷欲吐久矣敢不敬陳管測以佐工史之未議

乎伏讀

制策有曰尚德緩刑之令時頒而仁讓未興發帑蠲

租之詔屢下而休養未遂

聖慮及此誠四海萬姓之福也臣聞古者教養之權

操於上而後世教養之事聽諸民之自爲惟聽

諸民之自爲故欲遂其生而無所以生之道欲
置身於仁讓而無相率於仁讓之資其勢必窮
而自止今之民何民也哉自徵輸之限迫而吾
民曾不得含哺鼓腹矣自告訐之繁滋而吾民
曾不得出作而入息矣自墨吏之風熾而吾民
曾不得盈倉箱而寧婦子矣自逃人之累深而
吾民曾不得聚室廬而安黨塾矣於是命長吏
以督之曰爾其耕爾其穫爾其蠶爾其織爾其
字幼孩爾其親長上爾其敦廉耻而崇揖讓意
非不善然吾民方救死逃亡之不暇而暇仁讓

乎哉故欲化民者必緩催科除苛政以安其身
而遂其生蓋蠲租發帑行於暫不能行於久也
則預徵之令可緩也尚德緩刑之文布於上而
不能奉於下也則名實之際不又宜核耶如是
而民力裕民力裕而休養遂休養遂而仁讓可
興矣至於度務審幾以衡法制之源則在崇寬
大而不在綜名法在乎誠信而不在矜紛更蓋
寬大者盛世之事而名法者叔季之所爲也誠
信者天下之所共見而紛更者人心之所難遵
也此又教養之本也

制策有曰近見引律多煩駁察誣良時見叅奏出入
輕重之間卒多未協於中此又古聖王刑期無
刑之盛心也夫刑者所以佐禮之不及者也聖
人不得已而用之要使用刑之時常存不忍之
意則刑日簡而無刑之治以成後世律令愈繁
而犯者益衆犯者益衆而玩法者愈多蓋徒知
刑法之當嚴而未探乎仁恕之本也

國家監前制而定律令至慎也復熟審之制至仁
也肆赦屢下而免殊死者無筭至德也然而罔
罔未虛爰書未靖者著此何爲哉夫刑當乎罪

則重非失入而輕非失出刑不當乎罪卽絕其
自新之路輕或啓其爲惡之心今之民豈無無
辜而波累者乎豈無奸宄而幸免者乎豈無威
挾賄賂以出入人罪而莫敢控愬者乎有之而
上不知也其何以一天下之人心哉惟嚴濫刑
之罰以行其寬慈而有司之嚴刑以逞者無有
也遵一定之律以期平允而承問之借例以任
其出入者無有也然又在復恤刑之制以審其
輕重今日之刑督撫曰可部臣亦曰可耳或有
一二駁案不過深文曲筆而事已結矣雖臯陶

執法豈能身不親五聽而信天下無冤民哉夫恤刑者佐督撫之不及而察郡縣之偶失故此制一復則天下可以歲活數什伯人蓋自昔先王開一而予之生路者此也至若救荒之前我

皇上軫念民間疾苦每遇水旱賑恤備至淮揚災則發粟矣江浙災則改折色矣更若開援納以救窮黎停逋欠以寬民力宜災祲不足患而百姓無有饑色矣然邇年以來濟夫民者半以濟夫官則民荒於貪吏也賑於上者不盡賑於下則

民荒於中飽也卽遇災停徵而停於上者未必停於官則民荒於苛斂也或曰常平社倉諸法可做而行也然試思今之吏卽正賦所入且爲侵欺爲刻剝而欲積穀以裕民司出納而無弊其不流爲囊橐之資也何可得哉然則救荒果無策矣臣愚以爲其道莫若勸農今天下之民皆由於嬉遊而失本業以至災祲至而無以自存若羣趨於畎畝則平日之蓋藏自裕而又簡循吏以勤其撫字而不爲繭絲則民有備荒之實而吏無致荒之政夫吏無致荒卽不幸而荒

又何在而不可救哉卽常平社倉諸法又何不可爲積貯之計哉要之帝王立治之本尤在以實心行實政興禮樂崇教化疎禁網布仁德簡賢才遵舊章此實政也昭惇大彰誠信勵明作持體要通民情權國用此實心也惟皇上以數者之實心體數者之實政而內外臣工又各盡其職將朝有脩明之法紀野有豐亨之民生獄訟衰息而比戶可封教化流行而治登仁壽所謂治安之實也何治獄備荒之足慮哉臣草茅新進罔識忌諱干冒

宸嚴無任戰慄隕越之至臣謹對

臣徐秉義

臣對臣聞古帝王之膺天命而撫萬方也必有整齊畫一之法以正天下之民德亦必有休息愛養之澤以厚天下之民生懼民德之未正也爲之敦教化明禮義使之相安於和平長厚之俗而不至輕犯法以煩司寇之條懼民生之未厚也爲之重農桑輕賦役使之寬然於仰事俯育之內而不至生怨咨以干造物之和是故刑罰之設皆聖人仁天下之心拒民之入而非慮

民之出也積貯之策皆聖人仁天下之心爲百姓儲不足而非爲國家計有餘也要令天下之人共趨於忠厚長者之行各遂其室家婦子之樂而天下固已大治不然雖日討斯民而訓之明其法禁厚其蠲復而民德未正民生未遂也爲其無仁天下之心也堯舜禹湯文武之治亦惟先禮而後刑因庶而加富兢兢焉常恐一事之未協於中一夫之不得其所故其化至於刑措不用民風殷庶熙熙皞皞而一德同俗也欽惟

皇帝陛下

凝鼎居貞

資乾作始

學全天縱合知仁勇以成能

聖盡人倫本孝弟慈而立教

宵衣旻食卽康功於百僚奏對之時

嗣服紹庭揚大烈於四海會同之日

禮先農而舉耜我疆我理念稼穡之艱難

開秘殿以橫經汝翼汝爲廣臣鄰之啓沃固已六

服承德百度維貞矣乃猶進臣等而

親策之慮教養之未至而思緩刑薄賦恤民命而厚
民蓄以臻物阜時雍之治臣雖固陋敢不以一
得之愚仰塵

睿覽乎

臣

惟安民之道亦務其所以教民全其所以

養民者而已教不先則百姓日冒於文法而不
自知養不預則一遇水旱凶荒而卽有轉徙流
亡之患故教思容保臨民之實務生聚教誨治
國之遠圖帝王致治保邦未有不出於此者我
皇上未明求衣孜孜圖治薄歛緩徵漸仁靡義正德
厚生之事何一不見諸施行乃尚德緩刑之命

時頒而仁讓未興發帑蠲租之詔屢下而休養
未遂意者奉行之失實澤不下究歟抑凋敝已
久其治有不可旦夕效者歟夫三代之世黨庠
術序皆設教之地閭師州長皆興教之人一夫
之田五畝之宅各安其業各習其事其民服畎
畝則爲農誦詩書則爲士無寡廉鮮耻之俗則
無甚富甚貧之民是以訟獄衰息而家有蓋藏
也後世治不古若而漢代循良之吏奉明教宣
德意循隴畝以勸農問父老之疾苦講社讀法
誥誡於里閭之間止訟息爭聽斷於稅駕之下

其治猶爲近古我

國家休養生息垂三十年崇節儉抑囂競此三者
教民之術也時下蠲恤之恩時申預征加派之
禁此三代養民之方也然有司徃徃以擊斷爲
能催科爲急日敝敝焉從事於簿書期會之間
而不能爲民興行力田作久安長治之計於是
怙侈之風不少衰止而歲一不登民多菜色然
則刑罰之日煩蓄積之無具皆由於此伏讀
聖制曰引律多煩駁察誣良時見叅奏出入輕重之
間率多未協於中何以使民氣無冤讞法皆當

此

皇上如天好生之仁也臣聞虞書曰罪疑惟輕與其
殺不辜寧失不經周書曰五刑之疑有赦五罰
之疑有赦古之君臣相告誡者惟此哀矜無辜
之心初非以武健嚴酷爲勝任而愉快也若以
苛爲察以刻爲明鍛鍊周內豈先王制刑之本
旨乃今有司多不能體

朝廷欽恤之仁以求情法之中惟是獄成奏當案牘
完結而已吏輕於用刑而民亦輕於犯令始焉
相怵於法之中旣焉相遁於法之外而五刑之

設遂有所不足畏逮事經駁察叅舞文者獲
罪含冤者得白而桁楊桎梏之間怨氣之積已
多矣臣嘗讀

大清律而歎忠厚之至也懼民之無知犯法而深爲
之防律文所載一歸淳簡有刑期無刑之意焉
然律者垂於百世者也令者出於一時者也漢
臣張釋之常執廷尉之平以回文帝之怒明乎
一代定法雖人主不得而輕重焉臣以爲法司
定讞宜一以律爲斷而令之出於一時者量爲
寬減更明示以矜慎之意使天下曉然喻

上意所在不_至以失出爲懼而虛衷揆度以期至當
則輕重出入之間當無有失其平者而在外之
刑獄正不必遣內僚以聽斷刑罰清而民自服
也至

聖制以常平之設多屬虛文荒歉賑濟奉行不實欲
求利興弊革而進思乎耕九餘三之道興言及
此真百姓之福也夫天災流行聖世多有洪水
咨堯大旱傲湯而其時百姓無流亡轉死之患
儲蓄多而拯救急也故荒政十二載在周禮後
世仿而行之有常平有賑濟常平之弊也一出

一納或寡或多胥吏得以爲奸郡縣不免虛報
矣賑濟之弊也民困於災荒而必待有司之勸
報民急於焚溺而必俟部覆之准行則閭閻仍
苦於催科而老弱已填於溝壑矣故必如漢世
小饑發小熟之所斂大饑發大熟之所斂而常
平乃有實益也必如富弼之多方安集而施予
當其厄劉晏之預覘災荒而賑發應其時而賑
濟乃有實惠也而要以重農功修水利選良吏
薄征徭爲本使民之不荒於天時地利者更不
荒於人事此卽冢宰制用法所謂耕九餘三耕
三餘一者也惟在

皇上加意行之而已是故矜民於犯法之後不若寬
民於犯法之前救民於旣荒之年不若養民於
未荒之日文網不疎禮義不可得而興也法禁
不弛廉恥不可得而勵也東南之民力宜寬西
北之蒿萊宜闢夏稅秋糧之舊例宜復有司考
成之分數宜恤也則

聖制所云疎禁網以昭敦大緩催科以裕蓋藏真固
本寧邦之至計矣要非治人不足以理之非實
心不足以行之

皇上以仁天下之心平刑薄賦與百工共行治法共
圖實政不以勤始而怠於終不以飾外而疎於
內將見比戶可封而兩暘時若不與三代比隆
哉臣草茅新進罔識忌諱干冒

宸嚴不勝戰慄隕越之至臣謹對

